

Sing vooraf staande: Psalm 1:1 (p. 1)

- 1 Welsalig hy wat op die spoor nie gaan / waar sondaars lok; wat op hul pad nie staan,
of neersit waar die spotglans in die oog is, / waar spotters vrolik spot met al wat hoog is;
maar wat Gods wet in stille mymering, / by dag en nag, weer in gedagt'nis bring.

Ons hulp is in die Naam van die Here wat die hemel en die aarde geskape het.
Geliefdes, genade en vrede vir u van God ons Vader en die Here Jesus Christus deur die kragtige
werking van God die Heilige Gees.

Amen.

Lofpsalm 33:6 (p. 159)

- 6 Die HEER se raad word nooit gekeer nie; / dit sal bestaan in ewigheid.
Teen sy besluit is geen verweer nie; / bestendig duur dit vir altyd.
Salig wie tevore / deur Hom is verkore / as sy erf en lot;
wie so hoog geëer is, / dat dié HEER húl HEER is / en dié God húl God.

Gebed

- *Doksologie*
- *Aanbidding*
- *Skuldbelydenis*
- *Vergifnis*
- *Dank*
- *Smeking vir die nood van die gemeente en voorbidding vir die kerk,
owerhede en sondige wêreld, asook die beroep op die beloftes van God*
- *Algemene bede*
- *Verligting van die Gees ter wille van die Woorddiens*

Amen.

Psalm 65:2 (p. 314)

- 2 Dis waar, 'n donker skuldverlede / leef in ons heugenis;
maar al ons ongeregthede / word deur U uitgewis.
Welsalig wie in skuld verlore, / versoeningswoord hoor ruis;
vir wie U uitkies, lank tevore, / 'n woonplek in u huis.

Skriflesing: Johannes 3

Teks: Johannes 3:13, 14; Kategismus Sondag 7

**En niemand het opgevaar in die hemel nie, behalwe Hy wat uit die hemel
neergedaal het, naamlik die Seun van die mens wat in die hemel is. En soos
Moses die slang in die woestyn verhoog het, so moet die Seun van die mens
verhoog word, (Johannes 3:13-14 AFR1953)**

Die wat in die Here Jesus Christus glo, het die ewige lewe. Dit is die belangrikste ding wat ons in die
lewe het om aan vas te hou, want ons weet dat alle mense sonde doen.

- Ons beleef dit self dat alle mense op die een of ander manier medewerkers van die Satan is.
- Verder is dit ook so dat dit nie waar is dat alle mense God ken nie.

Nou kry ons by die Here die wete dat die wat glo die ewige lewe het.

- Die fantastiese is dat die Here nie sê dat die wat sonder sondes is die ewige lewe het nie. Hy
stel glad nie die eis van volmaaktheid nie.
- Hy stel die eis van geloof in Jesus Christus.

Kom ons kyk in hierdie preek na die volgende:

- 1. Die verhouding tussen sonde en verlossing**
- 2. Die kruisdood en geloof**

1. Die verhouding tussen sonde en verlossing

Al die eeue deur het die mensdom maar geworstel om die verhouding tussen sonde en verlossing uitgeklaar te kry. In wese gaan dit oor die verskil tussen

- wat Adam aan die mensdom gedoen het, en
- hoe die Here Jesus Christus die mensdom verlos het.

Die feit is dat die Here Adam voor 'n proefgebod gestel het.

- Die dag as hy in sonde val, dan val al sy nasate saam met hom in sonde.
- Prakties gestel beteken dit dat alle geslagte van mense wat gebore sou word, in sonde gebore word en daarin lewe. Dit raak ons dus ook.
- Dit verklaar die toestand waarin ons nou is.

Kan ons weer uit hierdie toestand uitkom? Die antwoord is reguit en duidelik: Ja ons kan, maar dan het ons 'n Middelaar nodig wat ons van die las van ons sondes kan verlos.

Watter eienskappe moet so 'n Middelaar hê?

- Die Bybel openbaar aan ons dat so 'n Middelaar 'n *mens* moet wees, want God straf nie iets anders vir die mense se sondes nie.
- Die Middelaar moet *volmaak* wees, sodat Hy nie self sondes het waarvoor Hy gestraf moet word nie, want dan kan Hy niemand verlos nie.
- Die Middelaar moet *God* wees, sodat Hy in staat kan wees om die straf van die Here te verduur sonder om vernietig te word.
- Presies al hierdie dinge was en is die Here Jesus Christus.

Hy het inderdaad gesterf en opgestaan en ons sondes met God versoen, sodat ons weer in God se genade kan lewe.

- Presies dit veroorsaak vir baie mense 'n ernstige probleem.
- As die Here Jesus God is, moet sy werk tog volmaak wees. Waarom is daar dan nog 'n hel en waarom ervaar ek nog elke dag dat die sonde my aanval?

Dit is waarom ons in ons belydenis (Kategismus vraag 20) ondersoek instel of alle mense in Christus verlos word soos wat alle mense in Adam verdoem is.

- Kom ons stel dit effens anders en miskien 'n bietjie meer in die idioom van ons tyd: Is die draagwydte van die Here Jesus se verdienste aan die kruis dieselfde as die draagwydte van die sondeval van Adam in die Paradys?

Dit is 'n baie delikate vraag, want alle mense word nie verlos nie!

- Ons moet net weet dat Adam en sy nasate in die moeilikheid is.
- Ons moet ook weet dat daar 'n Verlosser is.
- Ons moet ook weet hoe ons inskakel by sy verlossingswerk.

Wanneer ons iets soos hierdie wil uitklaar, moet ons net eers beseft dat ons dan met die volle raad van die Here werk en dat ons dan oor baie dinge duidelikheid moet kry wat alles met die verlossing saamhang.

- Een so 'n saak is die uitverkiesing van die Here.
 - Die uitverkiesing werp baie lig op die soenverdienste van Jesus Christus, want dit openbaar dat Jesus Christus beslis nie vir almal sterf nie.
 - Hy sterf net vir dié wat in Hom glo. Sulkes ontvang die ware geloof deur die werk van die Heilige Gees.

Daar is dus 'n groot verskil tussen die gevolge van die sondeval en dié van die verlossing deur Jesus Christus.

- Met die sondeval is die hele mensdom en die hele skepping vervloek om die mens se sondes se ontwil.
- Adam se misdaad word dus 'n geboortereg van elke mens.
- Die ooreenkoms tussen die twee gebeurtenisse is dat al twee werklik is – die een bewerk dood en die ander een gee lewe.

2. Die kruisdood en geloof

Die kruisdood was totaal anders as die daad van Adam, want waar Adam se optrede gestaan het in die teken van totale ongehoorsaamheid aan God, staan Jesus se optrede in die teken van algehele gehoorsaamheid aan God die Vader.

Die verskil tussen die twee gebeurtenisse is:

- Adam se daad sluit alle mense in wat liggaamlik van Hom afstam.
- Die Here Jesus se daad sluit alle mense in wat geestelik van Hom afstam (nl. gelowiges).
- Luister na wat Johannes (1:12) daarvan skryf:

Maar almal wat Hom aangeneem het, aan hulle het Hy mag gegee om kinders van God te word, aan hulle wat in sy Naam glo; (Johannes 1:12 AFR1953)

Alle mense wat die Here Jesus verwerp, word dus nooit kinders van God nie. Iets daarvan kom baie sterk deur in Johannes 3:18:

Hy wat in Hom glo, word nie veroordeel nie; maar hy wat nie glo nie, is alreeds veroordeel omdat hy nie geglo het in die Naam van die eniggebore Seun van God nie. (Johannes 3:18 AFR1953)

Die Here Jesus se kruis maak dus 'n baie duidelike skeiding onder die mense.

- Dit verskil van die verdoemenis wat deur Aadm gekom het, want almal deel voor die voet in Adam se moeilikheid.
- Die gedeelte wat ons nou net saam gelees het, maak dit ook duidelik dat almal wat Jesus nie aanvaar nie, in Adam se vloek bly.
- Die gelowiges gaan in God se rus in, terwyl daar ten opsigte van die ander 'n eed van die Here vasstaan dat hulle nooit in die Here se rus sal kan inkom nie.

Dit staan in Hebreërs 4:3 geskryf:

Want ons wat geglo het, gaan die rus in, soos Hy gesê het: Daarom het Ek in my toorn gesweer, hulle sal in my rus nie ingaan nie – alhoewel sy werke van die grondlegging van die wêreld af volbring is. (Hebreërs 4:3 AFR1953)

Die verskille tussen die sondedaad van Adam en die verlossingsdaad van die Here Jesus Christus kom verder uit in die verskillende verbonde waarvan hulle die hoof is.

- Adam is die hoof van die werkverbond. Hy moes die skepping bewerk en bewaak.
 - Later het hierdie verbond uitgekristalliseer in die Tien Gebooie.
 - Paulus noem hierdie verbond “die verbond van die dood” omdat niemand dit kon onderhou nie.
- Daarteenoor is die Here Jesus Christus die Hoof van die genadeverbond.
 - Hierdie verbond is baie beperk: Slegs almal wat in Hom glo, kry genade.

Adam het 'n vleeslike daad verrig en daarom is die straf daarop ook vleeslik.

- Jou liggaam gaan dood en word begrawe.
- Hierdie doodgaan is die simbool van die geestelike dood wat ingetree het as gevolg van die sondeval.

Juis daarom kom die Here Jesus Christus en Hy verlos liggaamlik en geestelik.

- Hy sterf letterlik soos ons en Hy word begrawe.
- Maar Hy kom terug uit die dood en bring ons saam met Hom terug in die lewe in.
- Daarom is die klem van sy verbond in hierdie lewe geestelik – jou siel word gered, maar op die laaste dag word jou liggaam ook opgewek en met jou siel verenig.

In hierdie verbond val die klem baie sterk op die Heilige Gees en sy werk.

- Ons word net deur die geloof in Jesus se verlossingswerk ingelyf.
- Dit word deur God die Heilige Gees bewerk, want niemand kan glo as die Here hom nie deur die Heilige Gees tot geloof beweeg en in die geloof laat volhard nie.

As alles om geloof draai, moet ons tog weet wat aangaan met geloof, en wat die inhoud daarvan is.

- Die apostel Paulus skryf in die Romeinebrief (1:17) dat iemand wat regverdig is, net deur die geloof die ewige lewe kan kry.
- Geloof is dus van kardinale belang.

Geloof is in die eerste plek **kennis**.

- Dit is dinge wat jy weet, omdat dit in die Bybel aan jou geopenbaar is.
- Daar is 'n verantwoordelikheid op elke mens om die Bybel te ondersoek en om dit wat daarin staan, sy eie te maak.

Dan is geloof ook **vertroue**.

- Jy moet dit wat in die Bybel staan, as waar aanvaar.
- Jy moet die vertroue hê dat die verlossingsraad van die Here wat daarin ontvou word, jou ook insluit.

Anders gestel:

- Die Bybel openbaar hoe die Here mense wat in die sonde geval het, daaruit verlos.
- Die genade is dat ek ingesluit is in die verlossing.
- Ek self word deur God begenadig.

Ons geloofsbelydenis is nogal 'n kort weergawe van die inhoud van die Bybel.

- Die eerste deel van die geloofsbelydenis sê wat ons van God die Vader weet en glo: Hy is ons Vader en Hy is die Skepper van die hemel en die aarde.
- Daarna bely ons dat, van God se kant af gesien, Jesus Christus God se eniggebore Seun is, maar van ons kant af gesien is Hy ons Verlosser.
- Ons bely al sy lyding en sy opstanding uit die dood.
- Ons bely Hom ook as die Hoogste Regter wat aan die einde van die tyd oor alle dooies en die wat dan nog lewe, gaan oordeel.
- Daarna bely ons die Heilige Gees en sy werk – die kerk, die opstanding en die ewige lewe.

Diegene wat hierdie dinge verstaan en sy eie maak, lewe nie meer onder die slawerny van vrees vir die dood en die lewe na die dood nie. Hierdie dinge gee ons die kennis en vertroue om met moed vorentoe te lewe totdat ons eendag voor God se troon staan in die hiernamaals.

Kom ons lees saam wat van hierdie dinge in die Heidelbergse Kategismus Sondag 7 geskryf staan:

Vraag 20: Word al die mense dan weer deur Christus salig soos hulle deur Adam verlore gegaan het?

Antwoord: Nee; (a); maar slegs die wat deur 'n ware geloof in Hom ingelyf word en al sy weldade aanneem (b).

(a) Matt 7:14; 22:14. (b) Mark 16:16; Joh 1:12; 3:16, 18, 36; Jes 53:11; Ps 2:12; Rom 11:20; 3:22; Heb 4:3; 5:9; 10:39; 11:6.

Vraag 21: Wat is 'n ware geloof?

Antwoord: 'n Ware geloof is nie alleen 'n vasstaande kennis waardeur ek alles wat God in sy Woord aan ons geopenbaar het (a) vir waar aanvaar nie, maar ook 'n vaste vertrouwe (b) wat die Heilige Gees (c) deur die evangelie in my hart werk (d), naamlik dat God nie net aan ander nie, maar ook aan my uit loutere genade, slegs op grond van die verdienste van Christus (e), vergewing van sondes, ewige geregtigheid en saligheid (f) geskenk het.

(a) Jak 2:19. (b) Heb 11:1, 7; Rom 4:18-21; 10:10; Ef 3:12; Heb 4:16; Jak 1:6. (c) Gal 5:22; Matt 16:17; 2 Kor 4:13; Joh 6:29; Ef 2:8; Fil 1:19; Hand 16:14. (d) Rom 1:16; 10:17; 1 Kor 1:21; Hand 10:44; 16:14. (e) Ef 2:8; Rom 3:24; 5:19; Luk 1:77, 78. (f) Rom 1:17; Gal 3:11; Heb 10:10, 38; Gal 2:16.

Vraag 22: Wat moet 'n Christen glo?

Antwoord: Alles wat in die evangelie aan ons beloof word (a) en wat die artikels van ons algemene en ongetwyfelde Christelike geloof ons in hoofsaak leer.

(a) Joh 20:31; Matt 28:19; Mark 1:15.

Vraag 23: Hoe lui die artikels?

Antwoord: (1) Ek glo in God die Vader, die Almagtige, die Skepper van die hemel en die aarde. (2) En in Jesus Christus, sy eniggebore Seun, ons Here; (3) wat ontvang is van die Heilige Gees, gebore uit die maagd Maria; (4) wat gely het onder Pontius Pilatus, gekruisig is, gesterf het en begrawe is en neergedaal het na die hel; (5) wat op die derde dag weer opgestaan het uit die dood; (6) opgevaar het na die hemel en sit aan die regterhand van God, die almagtige Vader, (7) waarvandaan Hy sal kom om die lewendes en die dooies te oordeel. (8) Ek glo in die Heilige Gees. (9) Ek glo aan 'n heilige, algemene, Christelike kerk, die gemeenskap van die heiliges; (10) die vergewing van sondes; (11) die opstanding van die liggaam (12) en 'n ewige lewe.

Amen.

Slotgebed

Slotpsalm 128:4 (p. 628) (Ons sing ons i.p.v. jy en jou)

- 4 Mag ryke seëninge / uit Sion jou bedou;
mag jy dié goeie dinge / van Sionstad aanskou!
mag jy nog, op jou bede, / 'n nakroosseen verkry!
En, God van alle vrede, / mag Isr'els vrede bly!

Die genade van die Here Jesus Christus en die liefde van God en die gemeenskap van die Heilige Gees bly by u almal.

Amen.

Dr MJ du Plessis
Gereformeerde Kerk Bellville
Datum: 28 Maart 2010